

ጳውሎስ ፕሊጲሲዮሳ አሳው ፃፊዳ ኪታ ጌሉዋ

ጳውሎስ ፕሊጲሲዮሳ አሳው ፃፊዳ ኪታይ ፃፊቴዳዌ፣ ማቀደኒያ ጊዲዋን ዳዒያ ሮሜን አሞዴቴዳ ፕሊጲሲዮሳ ጌቴቴያ ጋዲያን ዳዒያ አማኒያዋንቱሳ። ሃዋንቱ ጳውሎስ ኮይሮ አማንሴዳ ሺሺዳዋንታ። ኡንቱንቱ ሮሜ ጋዴ ዩሌታ ጊደ ዲራውኔ ቃሰካ ካሬ ጋዴ፤ ዩዳ ዋጋኒኔ አማኑዋን ዳሮፕ አዪና። ጳውሎሳ ቦላን ኡንቱንቱ ዳሮፕ ሃንቅቴዳ ጋሱካ ሃዋ (ኪት 16:20)። ሃ ኪታይ ፃፊቴዳዌ፣ ሃራ አማኒያ ኦሳንቻቱ ጳውሎሳ ቆፋ ጳልቂ ጳልቂዳ ዋዪሲያ ዋዲያናኔ ፕሊጲሲዮሳ አማኒያዋንቱ ጊደን ዴንዴዳ ዋርደ ቲሚርቴያ ጋሱዋን አ ዋዛናይ ዳሮ ካዮቲዳ ማዔዳ ዋዴኔ ቃሾ ጎሊያን ኢ ዳዒያ ዋዲያና። ጊደሺን፣ ጳውሎስ ዩሱሲ ኪሪሰቶሳ ሚኒሲዳ አማኒያ አሳ ጊዴዳ ዲራው። ሃ ኪታ ቦላን ቆንጨዳ ቤቲያዌ ናሺቻኔ ኩሜንላ አማኔቲያዋ።

ጳውሎስ ሃ ኪታ ፃፊዳ ኮይሮ ጋሱ አ ሜቱዋ ዋዴ አ ማዳናው ፕሊጲሲዮሳ አማኒያ አሳይ አሞታ አው ኪቲዳ ዲራው፣ ኡንቱንታ ጋላታናሳ። አ ቦላንካ ኡንቱንቱ ቦላንካ ዲማ ዲማ ሜቱ ጋኬዳዋ ጊደፕካ፣ ኡንቱንቱ ፃላና ማላኔ ኩሜንላ አማኔቲዳ ዳላና ማላ፣ ሃ ጋኬቲዳ ኢንጂያን ኡንቱንታ ማንሐሐ። አዩዋኔ ኦቶሩዋ ዲጊዴ፣ ዩሱሲ ኪሪሰቶሳ አሺኬቴላን ኡንቱንቱ ኩማና ማላ፣ ሚኒሲዳ ኡንቱንታ ሃሳዩሴዳ። ዩሱሲ ኪሪሰቶሳና ኢቲፕ ጊዴዳዋን ኡንቱንቱ ዳሜዳ ዳዑ ያሳ አጾ ከካቴላፕ ፑልቴዳዋኔ ኡንቱንቱ አማኑዋን አኬዳዋ ጊዲያዋፕ ኢቲን፣ አዩሁዳቲዋ ዋጋቱዋ ፖሊያዋን ቤቲዳዋ ጊዴናዋ ኡንቱንታ ሃሳዩሴ። ዩሱሲ ኪሪሰቶሳና ኢቲዋ ጊዲዳ ዳዒያ ኡባቶ ያሳይ ኢሚያ ሳርቴላባኔ ናሺቻባ ኡንቱንቱሲ ፃፊ።

ሃ ኪታይ ኤሬቲያዌ ናሺቻ፣ አማኔቲያዋ፣ ኢቲፕቴላኔ ኪሪሰቲና አማኑዋኒኔ ዳዑዋን ሚኒዳ ዳዒያዋ ጌሺዳ ቤሲያዋና። ሃዋ ቦላካ ጉጂዳ፣ ጳውሎስ ፕሊጲሲዮሳን ዳዒያ አማኒያ አሳቱዋ ሰቂያ ዋልቃማ ሰቂዋ ቆንጨሴ።

ሺምፓቱዋ ኡባቲዋሲ ኢሜቴዳ ቃንላ ቆፋቱዋ

- ጌሉዋ (1:1-11)
- ጳውሎስ ደዌዳ ደዑዋ ሃኖታ (1:12-26)
- ኪሪስቲና ደዑዋ ሌሚሱዋ (1:27-2:18)
- ዓሞቶሳሲኔ ኤጳፊሮዲቱሳሲ ደዒያ ቆፋ (2:19-30)
- አማኑዋ ኤቁቲያዋንቱፔ ናጌታና ማላ ኦዴቲዳዋ (3:1-4:9)
- ጳውሎስ ፕሊዲሲዮሳ አማኒያዋንቱሲ ሺሹዳ ጋላታኔ ማቁዋ (4:10-20)
- ዉርሴላ ቁቲያ (4:21-23)

ሳርታ

1 ኑኒ ዩሱሲ ኪሪስቶሳ ኦሳንቻቱ ጳውሎስኔ ዓሞቶሲ፡ ኪሪስቶሳ ዩሱሳን ደዒያዋንቶ፡ ፕሊዲሲዮሳ ጊያ ካታማን ደዒያ ጌሻቶ ኡባቶ፡ አማኒያዋንታ ካሌሌያዋንቶኔ ማዲያዋንቶ ሃ ደቢዳቢያ ፃፊቶ።

2 ኑ አዉዋ ያሳፔኔ ጎዳ ዩሱሲ ኪሪስቶሳፕ ኦጾ ከካቴላዪኔ ሳርቲላይ ሂንቴንቶ ጊዶ።

ጳውሎስ ዋሴዳ ጋላታ ዋሳ

3 ታኒ ሂንቴና ሃሳዪያ ዋዴ ኡባን ታ ያሳ ጋላታይ። 4-5 ሂንቴ ከዪሮ ጋላሳፔ ሃኖ ጋካናው፡ ሚሺራቹዋ ቃላ ኦዲያዋን ታና ማዴዳ ዲራው፡ ታኒ ኡባ ዋዴ ሂንቴንቶ ኡባው ናሼቻን ያሳ ዋሳይ። 6 ቃሲ ሂንቴንቱ ጊደን ሎዖ ኦሱዋ ደሚዳ ያሳይ፡ ኪሪስቶሲ ዩሱሲ ሲሚያ ጋላሳይ ጋካናው ፖላናዋ ኤራይ።

7 ታኒ ሂንቴንቶ ኡባው ሄዋዲን ቆፓናው ቤሴ፤ አዪሲ ጎፔ፡ ታኒ ሂንቴና ኡባ ዋዴ ሃሳያይ። ሃዒ ታኒ ቃሹዋን ደዒያዋንኔ ዋንጋላው ዋቴቲያዋን፡ ቃሲ ዋንጋላ ሚኒሳ ኤሲያዋንኔ፡ ያሳይ ታው ቃዴዳ ቃዳ ሂንቴካ ታናና ጊሺ አኬዲታ። 8 አዪሲ ጎፔ፡ ታኒ ሂንቴና ኡባቱዋ ኪሪስቶሲ ዩሱሳፔ ዪያ ሲቁዋን አይ ከና ሲቁንቶ፡ ያሳይ ታው ማርካ።

9-10 ቃሲ ታኒ ሂንቴንቶ ያሳ ዋሲያዌ ሃዋ፤ ሎዖባ አያኔካ ደራናው ሂንቴንቱ ዳንዳያናዲኒኔ፡ ቃሲ ሂንቴንቱ ሲቁ ቱሙ፡ ኤራቴላናኔ አከካ ኡባና አቲፔ ጉጂ ጉጂ ዲጫናዲን፡ ያሳ ዋሳይ፤ ያፔዴ ኪሪስቶሲ ሲሚያ ጋላሳን ሂንቴንቱ ሱሬኔ ፖኩ ባይናዋንታ ጊዳና። 11 ቃሲ ሂንቴንቱ ሺዎፑካ ያሳ ቦንቾኔ ጋላታው ዩሱሲ ኪሪስቶሳ ባጋና ቤቲያ ጂሎቴላ አይፊያ አዪፋና።

ጳውሎሳ ቃሹ ዋንጋላይ አካናዋ ዲጊቤና

12 ታናዳን ያሳ ካሊያዋንቶ፡ ሃ ታና ጋኬዳዌ ሚሺራቸዋ ቃላይ አካናዳን ቱሙ ማዴዳዋ ሂንቴንቱ ኤሪና ማላ ኮያይ።

13 ታኒ ኪሪሰቶሳ ዲራው ቃሼቴዳዋ፡ ካቲያ ጎሊያ ናጊያ ኡባቱኔ ሃዋን ዴዒያ ሃራቱ ኡባቱ ኤሪና። 14 ቃሲ ታኒ ቃሼቴዳዌ ኑ አሻቱዋ፤ ዳሪያዋንቱ ጎዳን ሎይሊ አማኔቲዴ፡ ያሳ ቃላ ያሺ ባይናን ካሴዋ፤ ፃሊዴ ኡዳናዳን ማዴዳ።

15 ቱሙ፤ ሊቱ ሊቱ ቃናቲያ ዲራውኔ ፓሉሚያ ዲራው፡ ኪሪሰቶሳዋ ኡዲና፤ ሺን ሃራንቱ ሎዎ አሙዋን ኡዲና። 16 ሃዋንቱ ያሳይ ታው ዋንጋላ ናጊያ አሱዋ አሜዳ ዲራው፡ ሲቂዴ ቃላ ኡዲና። 17 ሺን ዮኮንቱ ታኒ ቃሹዋን ዴዒሺን፡ ታ ቦላ ዋይያ አሃናዋ ኡንቱንቶ ማላቲና፡ ባሪና ሲቂያ ዋልቃማ አሙዋን ኪሪሰቶሳዋ ኡዲና፤ ኣቲን፡ ዋዛና፤ ኡዲሲና።

18 አይኔ ባዋ፤ ማላቲሲያ ኦዶኔ ገዶ ዋይ ቱሙ ኦዶኔ ገዶ፡ አይ አጊያኒኔ ኪሪሰቶሳዋ ኡዶ፤ ታኒ ሄዋን ናሼታይ። ሲንፋናዉካ ቃሲ ታኒ ናሼታይ። 19 አዪሲ ጎ፤ ታኒ ሂንቴንቱ ዋሳኒኔ ዬሱሲ ኪሪሰቶሳ አያና፤ ዪያ ማዴዋን አታናዋ ኤራይ። 20 ታ ዋልቃማ አሙኔ ያሳ፤ አካና ጋዴ ታኒ ናሼቻን ናጊያ ናጉ አይ ጎ፤ ታኒ ፓፃ ዴዒናካ ዋይ ሃዪቁናካ ያዬናን፡ ካሴዋዳን ሃዒካ ታ ኩሜንፋ አሳቴላን ኪሪሰቶሲ ቦንቸታናዋ፤ ኣቲን፡ ታኒ ሃራይ አቶ አቲባንካ ዬላቴናን አታናሳ። 21 አዪሲ ጎ፤ ታው ዴዑ ኪሪሰቶሳ፤ ቃሲ ሃዪቁካ ታው ጎዳ። 22 ሺን ታኒ ፓፃ ዴዒያዋን ዳር ጎዲያዋ አሳናዋ ጊዶ፤ ሃቃዋ ዶራኔንቶ ታው ኤሪቴና። 23 ታኒ ሃ ላዑ ዬዋቱዋን ሜቶታይ፤ ሃ ዴዑዋ፤ ሻኬታናዉኔ ቃሲ ኪሪሰቶሳና አቲ፤ ዴዒናው አዋታይ፤ ኪሪሰቶሳና አቲ፤ ዴዒያዌ ኡባ፤ አዴዳ ዳር ሎዎባ። 24 ሺን ታኒ ሃዪቁያዋ፤ ሂንቴንቱ ዲራው ፓፃ ዴዒያዌ ሂንቴና ዳር ኮሺያዋ።

25 ሃዌ ቱማ ጊዲያዋ ታኒ ጌሻዴ ኤራይ፤ ቃሲ አማኑዋን ሂንቴንቱ ዲጫናዲኒኔ ናሼታናዳን፡ ታኒ ሂንቴናና ኡባና ፓፃ ዴዒና። 26 ሄዋ ዲራው፡ ታኒ ሂንቴናና ላዔሉዋ ዪያ ዋይ፡ ኪሪሰቶሳ ዬሱሳና ሂንቴ ዴዒያ ዴዑዋን፡ ታባን ጨቁቲያባይ ሂንቴንቶ ዳራና።

27 ጊዶ፤ ሂንቴንቱ ሂንቴንቱ ሁጹው ኪሪሰቶሳ ዋንጋላው ቤሲያ ዴዑዋ ዴዒቴ፤ ታኒ ሂንቴና ባዴ ዋይ ቤዓና ቆዩና፡ ሂንቴንቱ አቲ ቆፋን ሚኒዴ ኤቆዳዋ፤ ቃሲ ዋንጋላ አማኖ አቲ ዋዛና ጊዲዴ አቲ፤ ባዳቴያዋ ሲሳና። 28 ሂንቴ ሞርኬቱዋሲ አያንካ ያዮ፤ ሄዌ ኡንቱንቶ ኡንቱንቱ ባሻ ጲሺሴ፤ ሺን ያሳይ ሂንቴና ያኒሲያ ዲራው፡ ሂንቴንቶ አቶቴላ ጲሺሴ። 29 አዪሲ

ጎፔ፡ ኪሪሰቶሳው ኦሊያ ቃዳይ ሂንቴና ጋኬዳዌ ሂንቴንቱ ኣኒ ኣማናና ፃላላሳ ጊዴናን ኣ ዲራው ዋዪያካ ኣካናሳ።³⁰ ታኒ ካሴ ባጭቲሺን ሂንቴንቱ ቤዔዳዋ ማላ ባጭኔ ቃሲ ሃዒካ ታኒ ባጭቲያዋ ሂንቴንቱ ሲሲያዋ ማላይ ሂንቴና ጋኬዳ።

2

ኪሪሰቶሲ ባሬና ካወሹዳዋ ለሚሱዋ

1 ኪሪሰቶሳን ሂንቴንቱ ዴዒያ ዴፀ ሂንቴና ዋዛንሉ? ኣ ሰቁ ሂንቴና ማንሌሉ? ጌሻ ኣያናና ሂንቴንቶ ኣቲፔቴላይ ዴዒ? ሂንቴ ኣቱ ኣቱዋሲ ከከቴኔ ቃሬቲቴ? 2 ያቶፔ፡ ሂንቴንቱ ቆፋን፡ ሰቁዋን፡ ዋዛናኒኔ ቆፋ ፖሉዋን ኣቱዋ ጊዲዴ፡ ታና ፖሎ ናሹቸቴ። 3 ሂንቴና ሰቁያዋን ዋይ ጨቁታናው ኮዪያ ማላ ኣሙዋን ኣቲባኔ ኦሎፕቴ፤ ሺን ኣቱ ኣቱዋፔ ቶቃይ ያጊዴ ቆፔናን፡ ኣቱ ኣቱዋሲ ሂንቴንቱ ሁጲያ ካወሹቴ። 4 ቃሲ ኣቱ ኣቱዋ ጎዒያዋ ኮያናፔ ኣቲን፡ ሂንቴንቱ ሁጲ ፃላላ ጎዒያዋ ኮዮፕቴ።

5 ኪሪሰቶሳ ዩሱሳን ዴዒያ ሃ ኣሺከቴላ ቆፋይ ቃሲ ሂንቴናንካ ዴዒናው ቤሴ።

6 ኢ ኡባ ዋዴ ያሳ ጊዲዴ ዴዒዳ፤ ሺን ኢ ዋልቃን ያሳ ከና ጊዲያ ማታይ ዴዒያዋ ቤሲያዋዳን ፓይዲቤና።

7 ሺን ኢ ባሬ ሹኒያን ኡባባ ኣጊዴ፡ * ኣይሊያ ማዴታ ኣኬዳ፤ ቃሲ ኣሳ ማላቲዴ ቆንጨዳ።

8 ኢ ባሬና ካወሹዳ፤ ሃይቆ፡ ኡባ ሃራይ ኣቶ፡ ማሰቃሊያ ቦላ ሃይቃናዉካ ኣዛዘቴዳ።

9 ሄዋ ዲራው፡ ያሳይ ኣ ሎይሉ ቶቁ ቶቁ ኦሌዳ፤ ቃሲ ሱንሳ ኡባፔካ ኣጲያ ቶቃ ሱንሳ ኣው ኢማዳ።

10 ሄዋ ዲራው፡ ሳሉዋኒኔ ሳዓን ሳዓፔ ጋርሳን ዴዒያ ኡባይ ዩሱሳ ሱንሳ ቦንቻናው ጉልባታና።

11 ቃሲ ኣሳይ ኡባይ ዩሱሲ ኪሪሰቶሲ ጎዳ ያጊዴ፡ ያሳ ኣዉዋ ቦንቻ ማርካታና።

ሃ ሳዓን ዴዒያ ኣሳሲ ፖዖ ጊዲያዋ

* 2:7 ኡባባ ኣጊዴ፡ ኢ ባሬና ማላ ኡዴዳ ጉሳ። 2:10 ኣሳ 45:23

12 ህዋ ዲራው፡ ታ ዳባቶ፡ ታኒ ሂንቴናና ዳዒያ ዎዴ ኡባን ሂንቴንቱ ታው አዛዜቴዳዎዳን፡ ሃዒ ታኒ ሂንቴንቱ ማታን ዳዒና ዎዴካ፡ ሂንቴንቱ ካሴዎፔ አሊዴ ታው አዛዜታናው ቤሴ፤ ያሻቴላኒ ኮርሳን ሂንቴንቱ አቶቴላ ፖላናው አሊቴ። 13 አዪሲ ጎፔ፡ ያሳይ ሂንቴና ባሬው ኤኖ ገሳናዳኒኔ ቃሲ ኢ ቆፔዳዎ ሂንቴንቱ አላናዳን ሂንቴንቱ ገደን ኡባ ዎዴ አሊቴ።

14-15 ጌላኔ ናጋራንቻ አሳ ገደን ፖኩ ባይናዎንታ፡ ጌሻቱዋ፡ ያሳ ናናቴዎዳንካ ፖኩ ባይናዎንታ ገደቲ፤ ቃሲ ዙዙሜናን ዎይ ኢታባ ቆፔናን ኡባባ አሊቴ። ሄ አሳ ገደኒካ ሳሉዋን ፖዒያ ያለንቲያዳን ፖዒዳ፡ 16 ዴዑዎ ሚሺራቹዎ ቃላ ኡንቴንቶ አዲቴ፤ ሃ ዎዴ ታ ዳቡራዪኔ ታ ኡሱ ሜላ ጳዪቤናዎ ኤሬቴያ ዲራው፡ ከሪሰቶሲ ሲሚያ ጋላሲ ታኒ ሂንቴናን ጨቄታና።

17 ሃራይ አቶ ሂንቴንቱ አማኑ ያሳው ያርሺያ ያርሹዎ ቦላ ታ ሱላይ ኢሻ ያርሹዎዳን ጉኮፔካ፡ ታኒ ናሽታይ፤ ሂንቴናና ኡባና ኢቲፔ ናሽታይ። 18 ህዋዳን ሂንቴካ ቃሲ ናሽታናው ቤሴ፤ ታናና ኢቲፔ ናሽቲቴ።

ዲዎቶሲኔ ኤፓፊሮዲቶሲ አሌዳ አሱዎ

19 ሺን ታኒ ሂንቴንቱ ዴዑዎባ ሲሳዴ ናሽታናዳን፡ ዲዎቶሳ ሂንቴኮ ኤሌካ ዬዳናዎ ጎዳ ዬሱሳን አማኔታይ። 20 አዪሲ ጎፔ፡ ሂንቴንቱ ዴዑዎባው ዎዛናፔ ሂርጊያ አ ማላ አሳይ ሃራይ ኦኒኔ ታው ባዎ። 21 አዪሲ ጎፔ፡ ሃራቱ ኡባቱ ባሬንቱ ሁጴ ጎዳ ኮዪና፤ ዬሱሲ ከሪሰቶሳዎ ኮዪኪና። 22 ሺን ናዒይ ባሬ አቡ አሊያዎዳን፡ ዲዎቶሲ ታናና ኢቲፔ ገደዴ፡ ዎንጋላ አሱዎ አሌዳዎን፡ አማኔቲያ አሳ ገደያዎ ኤሪሴዳዎ ሂንቴንቱ ኤሪታ። 23 ህዋ ዲራው፡ ታኒ ዬዒ ሃኒያዎ ቤዒዳ፡ ኤሌካ አ ሂንቴኮ ዬዳና ጋዴ ቆፓይ። 24 ታኒ ታ ሁጴው ማታ ዎዲያን ሂንቴኮ ባናዎ ጎዳን አማኔታይ።

25 ሺን ታኒ ታ ኢሻ ኤፓፊሮዲቶሳ፡ ታናና ኢቲፔ ታ ባጋ ገደዴ አሌዳዎ፡ አሌቴዳዎኔ፡ ቃሲ ታና ማዲያዎን ሂንቴንቶ ከቲቴዴ አሌዳዎ ሂንቴኮ ከታናው ኮሺያዎ ቆፓዲ። 26 አዪሲ ጎፔ፡ ኢ ሂንቴና ኡባ ቤዒናው ላዎቴ፤ ቃሲ ኢ ሳኬቴዳዎ ሂንቴንቱ ሲሴዳ ዲራው፡ ባሬ ዎዛናን ዳሮ ሜቶቴ። 27 ኢ ቱሙ ሳኬቴዳ፡ ሃዪቂ አቴዳ፤ ሺን ያሳይ አው ቃሬቴዳ፤ አ ፃላላው ገዴናን ካዩ ካዩዎ ቦላ ጉጃቴናዳን፡ ታዉካ ቃሬቴዳ።

28 ሲሚ ሂንቴንቱ ላዒንሉዎ አ ቤዒዴ ናሽታናዳን፡ ታዉካ ታ ዎዛና ካዩ ኢርፃናዳን፡ ታኒ ኤሌካ አ ሂንቴኮ ዬዳና። 29 ህዋ ዲራው፡ ጎዳን ዳዒያ ኢሻዳን፡ ኩሜንላ ናሽቻን አ ሞኪቴ፤ ቃሲ

አ ማላቲያ አሳ ኡባካ ቦንቸቱ። 30 አዪሲ ጎፔ፣ ሂንቴንቱ ሂንቴንቱ ሁጵው ታና ማዳና ዳንዳዬና ማዲዋ ማዳናው፣ ኪሪሰቶሳ ኦሱዋ ዲራው፣ ባሬ ሽምቸዋ ሽኔኮ ጊዳ፣ ሃዪቂ ኣቴዳ።

3

ቱሙ ዲሎቴላ

1 ወርሴላን፣ ታናዳን ያሳ ካሊያዋንቶ፣ ጎዳይ ሂንቴንቶ ናሽቻ አሞ። ታኒ ካሴ ፃፊዳዋ ዛሬላዳ ፃፊያዌ ታና ዋዪሴና፤ ቃሲ ሄ ፃፊያዌ ሂንቴና ናጋና።

2 ኢታባ ኦሊያዋንቱ፣ ሄ ካናቱዋ ኤሻይ ዳዒያዋንቱ፣ ቃፃራይ ኮሼ ጊያ አሳቱዋ፣ ናጌቲ። 3 አዪሲ ጎፔ፣ ኮኒ ያሳ ጌሻ አያናን ያሳው ጎዪኒያ ዲራውኔ ኑ ዳዑዋን ጎዳ ኪሪሰቶሳ ዬሱሳን ናሽቲያ ዲራው፣ ቱሙ ቃፃራ ቃፃሬቲዳዋንታ፤ አሳቴላ ቦላ ኦሴቲያዋን አማኖኮ።

4 ቃሲ ታው ታ ሁጲያንካ ታ አሳቴላን አማኔቲያዌ ዳዔ። አይ አሳይኔ ባሬ አሳቴላን አማኔቲያዌ ባሬው ዳዔ ጊዳ ቆፖ፣ ታኒ አፔ ሎይላ አዳይ። 5 ታኒ ዬሌቶዳፔ ሆሰፑንላ ጋላሳን * ቃፃሬታዲ። ታኒ ዬሌታን ኢሰራዔሊያ፤ ቢኒያማ ዛሬ፤ ዋላካይ ባዪና አዪሁዳ አሳ። አዪሁዳ ሂጊያ ናጊያዋን ጊዶ፣ ታኒ ፓሪሳዌ፤ 6 አዪሁዳ አማኖ ሴላ ጊዶ፣ ታኒ አማኒያዋንታ ዋዪሳዲ፤ ኢቲ ኡራይ ሙሴ ሂጌው አዛዜቲዳ ዲሊያዋ ባጋ ጊዶ፣ ታናን ፖኮባይ ቤቲቤና።

7 ሺን ታና ጎዒያ ሄ ኡባባ ኪሪሰቶሳ ዲራው ባዪዳዋዳን ፓይዳይ። 8-9 ቱማካ፣ ሄዋንቱ ፃላላ ጊዳና፤ ታኒ ታ ጎዳ ኪሪሰቶሲ ዬሱሳ ኤሪያዌ ኡባባ፣ ሎይሊ አዲያ ዲራው፣ ኡባባ ታና ሙሊካ ጎዒናዋዳን ፓይዳይ፤ ታኒ አ ዲራው ኡባባ ዬጋ ባሻዲ። ኪሪሰቶሳ ዳማናውኔ አናና ዳዓናው ኡባባ ዋራ ኦሌዳዋዳን ፓይዳይ፤ ታኒ ሙሴ ሂጌው አዛዜታዳ ዳሚያ ታ ሁጵ ዲሎቴላይ ታው ባዋ። ኪሪሰቶሳ አማኒና፣ ያሳይ አሚያ ዲሎቴላይ፣ አማኑዋን ያሳ ማታፔ ዪያ ዲሎቴላይ ታው ሃዒ ዳዔ። 10-11 ታኒ ኪሪሰቶሳኔ አ ዳንዲዋ ዋለቃ ኡራናው ኮያይ፤ ያታዳ ታኒ ታ ሁጵው ሃዪቂዋ፣ ዳንዳና ያጊያዋን፣ አ ዋዪያ አናና ዋዪታናውኔ አ ሃይቁዋን አ ማላታናው አሞታይ።

ጋኪያሳ ጋካናው ዋዲያዋ

* 3:5 ታኒ ዬሌቶዳፔ ሆሰፑንላ ጋላሳን፣ ሃዌ አዪሁዲያ አቱማ ናናይ ዬሌቶዳፔ ሆሰፑንላ ጋላሳን ቃፃሬቲያዋ ቤሴ።

12 ታኒ ሃዒ ዴማ ዲጋዲ ዋይ ታናን ባሊ ባዋ ጊክ። ሺን ኪሪሰቶሲ ዩሱሲ ታና ባሬው ኦፊዳ ዋይታ ዴማና ጋይ ኤሌላይ።
 13 ታናዳን ያሳ ካሊያዋንቶ፡ ታኒ ሄዋ ዴማ ዲጋዲ ጋይ ቆፒኬ፤ ሺን ታኒ ኢቲባ ኦሳይ፤ ታፔ ጉዬና ዴዒያዋ ዶጋይ ሲንሳን ዴዒያዋ ኦይቃናው ዋዴታይ። 14 ያሳይ ኪሪሰቶሲ ዩሱሳ ባጋና ቦላ ዴዐ-ዋሲ ያሲያ ዋይታ ኦካናው፡ ታ ጋካናው ዋዳይ።

15 ሲሚ ኩኒ ኦያናን ሚኔዳዋንቱ ኡባቱ ሃዋ ቆፓናው ቤሴ፤ ቃሲ ሂንቴፔ ኦማሪዳዋንቶ ኦያኒኔ ዲማ ቆፋይ ዴዎፔ፡ ሄዋካ ያሳይ ሂንቴንቶ ቆንጨሳና። 16 ጊዶፔካ፡ ኩኒ ሃኖ ጋካናው ዴዔዳ ማሪዳን፡ ኦኔ ሲንሳው ሄ ማራ ካሎይቴ።

17 ታናዳን ያሳ ካሊያዋንቶ፡ ታኒ ሃኒያዋዳን ሃኒቴ። ኩኒ ሃንቴንቶ ሌሚሱዋ ጊዴዶ፤ ሄዋዳን ሃንቴካ ኩኒ ሃንቴንቶ ሌሚሱዋ ጊዴዳ ማራ ካሊያዋንታ ኦኩኪቴ። 18 ኦዩሲ ጎፔ፡ ታኒ ሄዋ ሃንቴንቶ ካሴ ጮራቶ ኦዳዲ፤ ቃሲ ሃዒ ለዔፉዋካ ኦሮዓይ ሃንቴንቶ ኦዳይ፤ ኪሪሰቶሲ ማሰቃሊያ ቦላ ሚሲማሪያን ዲሽቴይ ሃዩቁዳዎ ባሬንቴ ሽምፑ ባሬና ሞርኬ ኦፊዳ ዳሮ ኦሳቱ ዴዒኖ። 19 ኡንቴንቱ ዉርሴላይ ባሻ፤ ኡንቴንቱ ኡሉ ኡንቴንቶ ያሳ፤ ዩላታናው ቤሲያዋን ኡንቴንቱ ኦቶሬቲኖ፤ ቃሲ ሃ ሳባባ ያላላ ቆፒኖ። 20 ኦዩሲ ጎፔ፡ ኩ ቢታይ ሳሉዋና፤ ኩኒ ቃሲ ሳሉዋፔ ያና ኩና ኦሺያ ጎዳ ዩሱሲ ኪሪሰቶሳ ናጌቶ። 21 ኪሪሰቶሲ ኡባባ ባሬፔ ጋርሳን ዋላናው ዳንዳዩያ ባሬ ዋልቃን፡ ኩ ዳቡራንቻ ኦሳቱላ ለሚዴ፡ ባሬ ቦንቾ ኦሳቱላ ማላቲሲዴ ኦላና።

4

ዉርሴላ ዘሪያ

1 ታናዳን ያሳ ካሊያዋንቶ፡ ታኒ ሲቂያዋንቶ፡ ላሞቲያዋንቶ፡ ታና ናሽቲያዋንቶ፡ ታና ዶቁ ኦሊያዋንቶ፡ ታ ዳባቶ፡ ሲሚ ጎዳን ሃንቴንቱ ሚኒ ኤቃናው ቤሴ።

2 ኤዎዴኔ ሲንግኬ፡ ሃንቴንቱ ላዑካ ቆፋን ኢቱዋ ጊዲዴ፡ ጎዳን ዴዳናዳን፡ ታኒ ሃንቴና ዘራይ። 3 ቃሲ ታናና ኦሊያ ኦማኔቲዳዎ፡ ኔኒ ሃ ማጫ ኦሳቱዋ ማዳናዳን፡ ታኒ ኔና ዋሳይ፤ ኦዩሲ ጎፔ፡ ኡንቴንቱ ታናናኔ ኡንቴንቱ ሱንላይ ያሳ ዴዐ-ዋ ማዳን * ዓፌቲዳ ቃሊሚንያሳና ቃሲ ታናና ኢቲፔ ኦሊያ ሃራቱዋ ኡባና ዋንጋላ ኡባሳ ጋላናው ዳቡራዲኖ።

* 4:3 ያሳ ዴዐ-ዋ ማዳን፡ ያሳ ኦሳ ሱንላይ ዓፌቲያ ማዳን።

4 ጎዳና ሂንቴንቱ ዳዒያ ዳዑዋን ኡባ ዋዳ ናሼቲቲ፤ ታኒ ሃዋ ጉጃዳካ ጋይ፤ ናሼቲቲ።

5 አሳይ ኡባይ ሂንቴንቱ አሺኬቴላ ኤሮ፤ ጎዳይ ማታን ያና።

6 ያሳ ሂንቴንቱ ዋሲያ ዋሳ ኡባን ኣ ሎይሌ ጋላቲዳ፤ ሂንቴና ኮሺያዋ ኡባው ዋሲቲ፤ ኣቲን፤ ኢቲባዉካ ሂርጎጎጎ። 7 ቃሲ አሳ ኤራቴላ ኡባ፤ ኣጂያ ያሳ ሳሮቴላይ ሂንቴንቱ ዋዛናኔ ሂንቴንቱ ቆፋ ጎዳ ዩሱሲ ኪሪሰቶሳ ባጋና ናጋና።

8 ወርሴላን፤ ታናዳን ያሳ ካሊያዋንቶ፤ ሂንቴንቱ ዋዛናን ሎዖባኔ ጋላቲሲያዋ ቆጎቲ፤ ቱማ ጊዲያባ ኡባ፤ ቦንቲሲያዋ ኡባ፤ ባዩዙዋ ጊዳናባ ኡባ፤ ጌሻባ ኡባ፤ ሲቁዋ ኡባ፤ ሱሬ ጊዲያባ ኡባ ቆጎቲ። 9 ሂንቴንቱ ታፔ ታማራዳዋ፤ አኬዳዋ፤ ሲሴዳዋኔ ቤዔዳዋ ኡባ ኦሊቲ፤ ቃሲ ኩሲ ሳሮቴላ አሚያ ያሳይ ሂንቴናና ኢቲ፤ ጊዳናዋ።

ባሬው ኪቴቲዳ አዎታው ጳዉሎሲ ጋላቲዳዋ

10 ሺን ዳር ዋዲያፔ ጉዩያን፤ ሃዒ ሂንቴንቱ ታዋ ላዕኔጉሉዋ ቆጎጎናው ደሜዳ ዲራው፤ ታኒ ጎዳን ሎይላ ናሼታይ፤ ታው ቆጎጎናው ሂንቴንቶ አንጃቴናን ኢጭዳዋ፤ ኣቲን፤ ታው ቆፋ ቆጎታ። 11 ታኒ ሃዋ ታና ሜቲዳ ዲራው ጊኬ፤ አዩሲ ጎፔ፤ ታው ዳዒያባይ ታው ጊዳና ተ ጊያዋ ታኒ ታማራዲ። 12 ታኒ ሜቶቲዳ ዋቲ ዳዒኔንቶ ኤራይ፤ ቃሲ ዱሪቴዳ ዳዒያዌካ ኣዩንቶ ኤራይ፤ ሃቃን ጊዲናካ አዉዳ ጊዲናካ፤ ታኒ ካሉዋኔ ኮሻ ቃሲ ፓጫኔ ፓላሃ ታማራዲ።

13 ኪሪሰቶሲ ታው አሚያ ዋልቃን፤ ኡባባ አላናው ታኒ ዳንዳያይ።

14 ጊደፔካ፤ ሂንቴንቱ ታ ሜቲዋ ታናና ሜቶቲዳ ዳር ሎይሌዲታ፤ 15 ፕሊ.ጲ.ሲ.ዮ.ሳ አሳው፤ ዋንጋላ ሚሺራቹ ኮይር ሂንቴ ጊደን ኦዴቴዳ፤ ሺን ታኒ ማቂደኒያፔ ኬሴዳ ዋዳ፤ ታና ኣማኒያ ሂንቴንቱ፤ ኣቲን፤ ሃራይ ማዲቤናዋ ሂንቴንቱ ሂንቴንቱ ሁጳው ኤሪታ፤ ቃሲ አሚያባንካ ኣኪያባንካ ሂንቴ፤ ኣቲን፤ ሃራይ ታና ማዲቤና። 16 አዩሲ ጎፔ፤ ታና ሜቲ ኦይቁዳ ዋዳ፤ ሃራይ አቶ ታኒ ቴሴሎንቁያን ዳዒሺንካ ታና ዛሪ ዛሪዳ ማዳዲታ።

17 ታኒ ሂንቴዋ ቦላ ሃራባይ ጉጃታናዋ ኮዩያዋ፤ ኣቲን፤ ዋዩታ ያላላ ኣካናው ኮዩኬ።

18 ሺን ታኒ ሂንቴንቱ አሚያዋ ኡባ ኣካዲ፤ ቃሲ ታው ፓላሂዳ ጊዲያዌ ዳዔ። ሂንቴ ኪቴዳ ኡባባ ኤፓሪሮዲቶሳ፤ ኣካዲ፤ ኮሺያ ኡባይ ታው ዳዔ። ሂንቴ ታው ኪቴዳ አሙ ያሳው ሳወዋ

† 4:11 ታው ዳዒያባይ ታው ጊዳና፤ ታው ዳዒያባን ታኒ ሸዎጎይ፤ ካላይ፤ ዋፕ ጋይ። 4:15 2ቆር 11:9 4:16 ኪት 17:1

ቶሺኩ ጊያኔ ኢ ዶሲያ፡ ኣ ናሼቲያ ያርሹዋ ማላ። 19 ቃሲ ታ ያሳይ ባሬ ቦንቾ ዱሬቴላ ዳሩዋን ኪሪሰቶሲ ዬሱሳ ባጋና ሂንቴና ኮሺያዋ ኡባ ሂንቴንቶ ኢማና። 20 ኑ ያሳው፥ ኑ ኣዎ ሜጲናፔ ሜጲና ጋካናው ቦንቾ ጊዶ። ኣሜንዒ።

ዉርሴላ ሳርታ

21 ኪሪሰቶሲ ዬሱሳዋ ጊዲያ ያሳ ኣሳቱዋ ኡባቱዋ ሳር ጊቴ። ታናና ሃዋን ዴዲያ ኢሻቱ ሂንቴና ሳር ጊኖ። 22 ሃዋን ዴዲያ ያሳ ኣሳቱዋ ኡባቱ፥ ኡባፔካ ኣሊዴ ካቲያ ቄሳሬ ጎሊያን ዴዲያዋንቴ ሂንቴና ሳር ጊኖ።

23 ኑ ጎዳ ዬሱሲ ኪሪሰቶሳ ኣቶ ኬካቴላይ ሂንቴናና ጊዶ።

Ooratha Caaquwaa New Testament in Dawro (ET:dwr:Dawro)

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source
files dated 29 Jan 2022
585b63ca-b8e6-55c8-bfef-10bdc95ad69c